

NEPIA, Maehe 22, 1865.
KI NGA TANGATA MAORI.
E hoa ma,—

Tena koutou. Tenei nga reta a nga Rangatira o Heretaunga, o Kaputi hoki, ka panuitia hei titiro iho ma nga tangata katoa kia kite i te whakaaro a enei tangata.

Kei te tika nga korero o enei reta: me mahi tahi tatou ki te pei i tenei kino i o tatou wahi katoa.

Na to koutou hoa,

Na te Kupa.

Pakowhai, Maehe 20, 1865.
KI A TE KUPA.

E hoa,—Tena koe. Tenei ta mautou reta ki a te Kawana mau e hoatu ki te "Waka Maori" kia kitea ai e nga hoa Maori.

Mau hoki e whakapakeha ka hoatu ki nga nupepa Pakeha kia kitea e o matou hoa Pakeha, ka tuku atu ai i te koiwi ki a te Kawana.

Na o hoa aroha,

Na Karaitiana Takamoana,
Na Wi Tako,
Na Renata Tamakihikurangi,
Na Matene Te Whiwhi,
Na Te Wirihana Taorangi.

Pakowhai, Maehe 20, 1865. Na te huihuinga katoa ki Pakowhai i te taenga mai o Ngatittoa, o te Atiawa, o Ngatiraukawa, me nga Rangatira o Heretaunga.

KI A TE KAWANA.

E hoa,—He reta whakaatu tenei na matou i to matou pouri mo tenei mahi kino a te Hauhau e mahia nei ki to tatou motu. I te riri ano matou i mua ake nei mo te kawenga mai ki o matou kainga ako haere ai, ka panaia atu kia hoki atu ki ona whenua mahi atu ai. Ko tenei, ka rongohia nei matou ki tana mahi kohuru i a te Wakana, Minita i Opotiki, ka nui rawa atu to matou pouri, to matou wetiweti noa iho. Katahi ano hoki te tinana o te kohuru whakahouhou rawa ka kitea ki Nui Tireni. Tera ano nga tangata mau patu hei hoa riri mona kia kitea ai tona toa; anga noa iho tenei ki te tangata ringaringa kore, ki te tangata hara kore, ki tona matua ake. To te tautaua tona ahua, parea ketia iho ana te mata o tana rakau ki tona matua nana ia i whakatupu.

Na aua kaikohuru i anga atu ma runga i ena iwi haere ai, i puta ai ratou, i roa ai ia e korero haere ana. Me he mea hoki ia i tutuki mai makonei, kua mau ia i a matou, penei ma o matou ringaringa ano e hoatu ki a koe; kua kore nei e tae mai, a, kati, ka waiho tonu tenei hei ture ma matou mo nga kai hari i nga upoko Pakeha ma runga i o matou wahi; ki te tahuri mai ia ki ahau, kaore ia e waiho, ka mate ia i au.

E hoa, kia rongohia mai koutou ko nga iwi; katahi ano kanui rawa to matou pouri ki nga mahi o to matou whenua. Na wai ra i riri ki a raua whakatangata, ka riri hoki tenei ki te Atua, ka hou haere tenei ki nga mahi ano o te pouritanga ra ano. Otira, kei mahara mai koe na te katoa tenei mahi kino; kei te nui ano nga iwi kaore ano i uru noa ki enei mahi kino—ma te Atua e atawhai e tiaki.

Heoti ano, na o hoa,

Na Karaitiana,
Na Wi Tako,
Na Renata Tamakihikurangi,
Na Matene Te Whiwhi,

Na Henare Matua,
Na Wi Parata,
Na Karanama te Kapukai,
Na Henare Tomoana,
Na Te Wirihana Toatoa,
Otira na matou katoa.